

SOALAN NO.:18

PERTANYAAN DEWAN RAKYAT

PERTANYAAN : LISAN

DARIPADA : YB. TUAN AHMAD MARZUK BIN SHAARY

KAWASAN : BACHOK

TARIKH : 28 MEI 2015, KHAMIS

SOALAN:

YB. TUAN AHMAD MARZUK BIN SHAARY (BACHOK) minta **MENTERI KERJA RAYA** menyatakan senarai jambatan-jambatan baru yang telah rosak akibat kecuaian kontraktor dan kelemahan pemantauan agensi di seluruh negara. Apakah pihak Kerajaan tidak bercadang untuk membantu dalam projek pembinaan semula jambatan Pengkalan Haji Ali yang runtuh beberapa tahun lalu di Bachok.

JAWAPAN:

Tuan Yang Di-Pertua;

Untuk makluman Ahli Yang Berhormat, setakat ini tiada kes dicatatkan oleh Jabatan Kerja Raya (JKR) mengenai jambatan yang baharu disiapkan tetapi mengalami kerosakan akibat kecuaian kontraktor atau kelemahan pemantauan JKR.

Ini kerana JKR sentiasa memantau pelaksanaan sesuatu projek iaitu daripada peringkat perancangan hingga ke peringkat pasca pembinaan. Jika terdapat sebarang kecacatan atau kerosakan yang dikesan, JKR akan mengarahkan pihak kontraktor untuk melaksanakan kerja-kerja pembaikan terlebih dahulu sebelum Sijil Kesempurnaan atau Sijil Siap Membalik Kecacatan dikeluarkan untuk projek tersebut.

Mengenai isu keruntuhan jambatan Pengkalan Haji Ali di Bachok pula, untuk makluman Ahli Yang Berhormat jambatan tersebut terletak di bawah bidang kuasa dan seliaan Pejabat Tanah dan Jajahan Bachok, iaitu berstatus projek Jalan Negeri. Sehubungan itu, JKR Bachok telah memberikan khidmat nasihat teknikal dan seterusnya mencadangkan kepada Pejabat Tanah dan Jajahan Bachok supaya membina jambatan yang baharu bagi menggantikan jambatan yang runtuh itu.

Cadangan ini perlu dipertimbangkan oleh Pejabat Tanah dan Jajahan Bachok kerana projek ini melibatkan peruntukan Kerajaan Negeri Kelantan.

Sekian. Terima kasih.